

## حلمي



حلمك بيفسر حلمي

مع إن الليل اللي ما بيننا

بيفضل صاحي...

لحد شروق الشمس

مستني رسالة تطلّعي

من بير اليأس

ما انا أصلي باشوفك في الحلم

وحروف بتصحّي الليل

مواويل.. وأغاني أفراحي

والشوق وليالي الصبر

وكلام ما اعرفش منين بتلم

احكي لي وسمّني  
أنا وحدي وبس  
واسأل وأجوب  
وأحط الأعدار وأسامح  
وباطواع قلبي  
اللي بعاند واتصالح  
وبينسى الأوجاع ويحنّ  
وبيسرح ويتوه.. وساعات يتألم  
وساعات في الصمت بيتكلم  
وكأني شربت من النيل المالح  
فبتطلع جوايا النار  
وكأني ملبوس بالجن  
وافتكر امبارح

والشوق واللهفة،  
وسلام الإيد والنظرة  
واتطمئن حبة  
شبه المولود في اللفة  
وف حضن حنين يتدفق  
ويعيش مش خايف بكرة  
ولا خايف من زمن الضعف  
أما بيرسم تجاعيد ع الكف  
ولاحساس إحساس الضيف  
اللي هايمشي.. ف حرارة الصيف  
أنا بس الخوف اللي مالكني  
وكأنه السيف اللي مشقق وشي  
مش عارف أنا ليه حسيت

إني خلاص أصبحت  
ف كواليس الذكرى  
بتقطّع في ضلوعي الفكرة  
مع إن الحب اللي أنا عايشه  
مخلوق بالفطرة  
معقولة الروح هاتعيش  
ع الدنيا من غير أنفاس؟!  
وايه يعني...  
لو مرة حسدونا الناس؟!  
أنا مؤمن بالعشق ومتحصّن  
ومعتّق قلبي الإحساس  
ماهو غصبن عني  
أما اتعصّب، واغضب

والغيرة ف أحزان ترميني

مع إني من حقي أغير

دا الحب اللي ماليني..

مخَلّيني أطيّر

بني آدم حر..

بجناح عصفير

والله يارب انا حبيت

وبدمع العشق وأفراحه..

ياما اتوضّيت

وفرشت الشوق

على أرضي حصيرة

وكَثَّرت وصليت

أنا أصلي مريض بالغيرة

خائف لتأخذني المتاهات والحيرة

ولآ اصبح تفاصيل الصورة

المركونة على الحيط

مع إنى والله يارب انا حببت

وبدمع العشق وأفراحه

اتوضيت